

## MUSTAFA DOZIĆ - E G B E R -

Nepredvidivi su putevi kojima čovjek tokom svog života prolazi brane i prepreke, na koje idući putem nailazi.

Sudbine nemaju pravila, zakonitosti, a svakom čovjeku svojstvena je njemu samo pripadajuća.

Mustafa je rođen u Bratuncu, bosanskom mjestu, na razmeđu svjetova kultura i interesa.

Svoje življenje, svoj rad i svoju snagu posvetio je rodnom Bratuncu, a sudbina je htjela da svoje zadnje dane i svoje vječno stanište nađe daleko od rodnog grada.

Geodetsku tehničku školu završio je 1949. godine, a svoje službovanje, uglavnom, je vezao za Bratunac. Predano se bavio katastrom zemljišta, uređenjem odnosa među ljudima u povodu nekretnina.

Geometar - Egber poznat je u stručnim krugovima širom Bosne i Hercegovine, po njemu svojstvenom načinu, uređenja odnosa na relaciji građanin - geodetski stručnjak.

Djelovanje na polju geodezije prenosi i u okviru Saveza geodetskih inženjera i geometara Bosne i Hercegovine. Nezaboravne su skupštine i drugi susreti geodetskih stručnjaka održani u Bratuncu. Egber u te susrete ugrađivao je sebe, koristio svoje bogato iskustvo dobrog organizatora i poznavao ljudskih potreba, uzajamnosti i saradnje.

Rahmetili Mustafu Dozića rat je zatekao na skupštinskom zasjedanju u Sarajevu. Agresorska blokada spriječila ga je da se vrati u rodni Bratunac, među svoj narod, svojoj porodici.

Sudbina je htjela da do svoje smrti ne sazna ništa o svojoj porodici-djeci, supruzi i unučadi.

Bez obzira na velike nevolje koje su zadesile Bosnu i

Hercegovinu, pa i njega samog, Egber je nalazio snage da učestvuje kao poslanik, u radu poslanika, zatečenih u opkoljenom Sarajevu, dajući pri tome svoj doprinos očuvanju cjelovite Bosne i Hercegovine.

Mađa skrhan teškom bolešću nalazio je vremena i snage da se posveti izbjeglicama i prognanim licima, da im, u granicama svoje mogućnosti, pomogne, ako ničim drugim, onda ljudskom toplom riječju.

Zadnje mjesece svoga života proveo je u bolnici, okružen pažnjom i brigom bolničkog osoblja, a posebno prof.dr. Naima Kadića i Bičević Lamije. I u zadnjim danima života prisutna je bila vjera da će se vratiti u rodni Bratunac i svojoj porodici.

Umro je 30.maja 1993.godine, u 65-toj godini života. Dženaza je obavljena na groblju "Budakovići" u Sarajevu 7.juna 1993.godine.

*Mustafa Begić*